



16. juni 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit biilit sarfatorlutut kiisalu sarfatorlutillu orsussamik ingerlatillit kiisalu nunakkut angallatit motorilinnut akitsuutaat pillugit:

- 1. Biilit sarfatorlutut aamma sarfatorlutillu orsussamik ingerlatillit Kalaallit Nunaanni qassiuppat? Akissut kisitsisit atorlugit skemanngorlugu takuteqquneqarpoq immikkoortillugit biilit sarfatorlutut aamma biilit sarfatorlutillu orsussatorlut.**
- 2. Orsussa atorneqartartoq minnerulerpa biilit sarfatorlutillu innaallagiartortut atorneqalermata?**
- 3. Biilit sarfatorlutut kiisalu sarfatorlutillu orsussatorlut pillugit Naalakkersuisut nutaamik inatsimmik atortussanngortitsinissartik suliaraat aamma taamaassimappat immikkoortuni sorlarni?**
- 4. Biilinit sarfatorlutillu orsussatorlutunut akitsuutit qanoq annertutigisut Nunatta Karsiata iluanaarutigisinnaavai piginnittut akitsuummik biilit naliginnaasut akilertagaasa assignanik akiliisassappata?**
- 5. Nunakkut angallatinut motorilinnut akitsuusersueriaatsip atuuttup allanngortinnissaa Naalakkersuisut sulissutiginiarnerlugu tassunga ilanngullugit akitsuutit biilinit sarfatorlutunut aamma /imaluunniit biilinit sarfatorlutillu orsussatorlutunut?**
- 6. Naalakkersuisut uppersarsinnaanerlugu inatsisip amingarnera pissutaalluni imaamat imaluunniit imaassimamat, biilit angeqqatigiit, ukiunili assignngitsuneersut, assignngitsunik akitsuutinik akiliisarsimammata, taamaassimappallu iluarsiinartoqalersimanerluni biiliutillit, akiliivallaarsimasut utertitsinissartik naatsorsuutigisinnaanngorlugu?**



7. Nunami angallatinut motorilinnut akitsuutit nutaat pillugit siunnersuut Naalakkersuisut nassiussuuteqqammerpaat tusarniaassutigalugu. Tassunga atatillugu imaattunik apeqqutissaqarpunga:

- a. Suna pissutaava kissaatigineqarmat biilinit angisuunut akitsuutip qaffangaatsiarnissaa soorlu Toyota RAV 4-nut?

- b. Misissuinerit suut tunngaviuppat Naalakkersuisut oqarmata biilit sarfatorlutut aamma biilit sarfatorlutillu benzinatorlutut ataatsimut isigalugu avatangiisinut mingutsitsinnginnerusut benzinatorlutut biilinit naleqqiullugit? Tassunga atatillugu Naalakkersuisut qinnuigissavakka isiginaqqullugu biilerpassuit sarfatorlutut aamma sarfatorlutillu orsussartortut biilinit benzinatorlutut naleqqiullugit oqimaannerujussuusarmata taamaattumillu aqqusinernik nungullarsaanerusartussaallutik peqataanillu nukiit annertunerusut atorpeqartartussaallutik nuunneqassatillugit. Avatangiisinut naatsorsuutit ataatsimoortut qanoq ilillutimmita pitsaanerusinnaasimappat?

- c. Naalakkersuisut pilersaaruteqarnerlutik akitsuutinik allanik qaffaanissaminnut (soorlu inuussutissat, imigassat, tubat, sukut assigisaallu eqqarsaatigalugit) akissaqartikkumallugu biilit sarfatorlutut akitsuuteqarunnaarsinnissaat aamma biilit sarfatorlutillu orsussartortut akitsuutaat appaseqisoq.

(Inatsisartunut ilaasortaq Randi Vestergaard Evaldsen, Demokraatit)

Tunngavilersuut

Biilit sarfatorlutut aamma sarfatorlutillu orsussartortut avatangiisinut mingutsitsinnginnerusutut naatsorsuutigineqakkajuttarput aamma taakkorpiaat illoqarfinni saqqumilaarnerulernikuupput. Misissorluaraannili biilit sarfatorlutut biilillu sarfatorlutillu orsussartortut biilinit naliginnaasunut naleqqiullutit silaannarmik mingutsitsinerupput aamma misissuinerit assigiinngitsut arlallit takutippaat, CO₂-mik mingutsitsineq millerusunneqarpat taava paarlattuanik motorinik ikummatissamik atuiilluarsinnaanerumik ineriartortitsisoqartariaqartoq. Tunngaviusumik biilit sarfatorlutut biilillu sarfatorlutillu orsussartortut biilinit benzinatorlutut naleqqiullutik



mingutsitsinikinnerusussaagaluarput, kisiannili apeqqutaavoq, sarfaq suminngaanniit pissarsiarineqartarnersoq. Sarfatortunik biililippassuit biilitik angerlarsimaffimmini unnukkut orsersortarpaat taamaattumik ilaatigut sarfamik atuineq qaffaserujussuareerpoq, innaallagissiorfimmillu artorsartitsereerlutik (immaqa aamma ilaannikkut allaat artukkiisarput?)

Biilini sarfatortunik sarfatorlutillu orsussatortunik sanaartornermi taava sanaartortup akisussaaffigisarpaat CO₂-mik 13.600 kiilunik mingutsitsineq, paarlattuanik biilini naliginnaasunik sanaartorneq affaannaanik mingutsitsisarpoq. Biili naliginnaasoq sarfatortunik sarfatorlutillu orsussatortunik sanaartornertulli mingutsitsisalissappat taava mootori 2.0-mik sakkortussusilik ingerlasariaqassaaq 85.000 kilometerinik.

Misilittakkat takutippaat biilit orsersorneqassatillugit isserujussuartillugu sivikitsuinnaap ingerlanerani batteria nunguttartoq taamaattumillu mootoria orsussamik ingerlatilik aallartariaqartartoq.

Biilit sarfatortut kiisalu biilit sarfatorlutillu orsussartortut biilinit naliginnaasunut naleqqiullutik oqimaannerusarput taamaakkaluartorli akitsuuteqanngillat, naak oqimaannerugamik aqqusinernik nungullarsaannerusaraluartut.

Tamatuma saniatigut ilisimavarput, inuit ilaat sarfatorlutillu orsussartortunik biililit sarfaq atornagu benzina orsussatut atortaraat. Taamaasillutik akitsuutit eqqussinermilu akitsuutit sipaartarpaat, qaavatigullu akikitsumik orsussamik pisisarlutik - isumaqarpugut tamanna assigiinngisitsinerusoq.

Nunakkut angallatit motorillit akitsuutaannut siunnersuut tusarniutigissallugu nassiunneqaqqammersoq pillugit isumaqarpugut soqutiginarluinnartoq akitsuusersueriaatsimut nutaamut Naalakkersuisut eqqarsaataat. Kisianni allaanngiivippoq eqqarsaatigineqarsimanngitsoq Issittumiinnerput kiisalu issittarnerput ilaannikkut biilinit sarfatortunut aamma sarfatorlutillu orsussatortunut immikkut ajornartorsiortitsisarpoq taamaattumillu oqaannartoqarsinnaanngitsoq, biilit taamaattut avatangiisinut mingutsitsinnginnerusut biilinit benzinartortunut naleqqiullugit.

Apeqqutit akeqqakka ullut suliffiit naliginnaasut qulit iluanni.



DEMOKRAATIT
DEMOKRATERNE